

欽
定
全
唐
文

欽定全唐文卷八百五十六目錄

新文豐出版社藏書

蘇德潛

禁道士攜妻孥奏

淳于希顏

請禁括田出剩求功奏

李守瓊

禁沙門著紫奏

徐綸

龍泉寺禪院記

元化長壽禪院記

盧瓊

請建高祖別廟奏

王易

請復尚書省令式奏

呂咸休

請令閩浙貢物自出腳乘奏

咸師範

乞宣賜物業奏

劉暉

請慎擇牧守疏

高行周

辭讓詔不呼名奏

趙延乂

嫂喪宜依令式服大功議

張仁瑑

請令瘞埋刑人奏

論史在德罪議

賈緯

上唐年補遺錄奏

拜給事中自訴奏

昭義軍節度使安元信諡議

李元懿

上六事疏

石公霸

本管縣鎮越訴鳳翔奏

馬裔孫

免史在德言事罪詔

盧損

酌定不便時宜條件奏

請停春關宴奏

陳五事疏

許遷

破河東賊奏

欽定全唐文卷八百五十六

蘇德潛

德潛漢乾祐三年官右補闕

禁道士攜妻孥奏

臣聞道以至真爲本自然爲宗若不離嗜慾之源則安奏
虛無之理況兩京道宮是國家崇福之地竊見道場所設
齋醮無非蠲潔淨筵蓋表其精虔也訪聞道士皆有妻孥
攜在道宮居止不獨傷於教法其實汙於清虛望特行禁
止

淳于希顏

希顏漢乾祐三年官左補闕

請禁括田出剩求功奏

竊以久不簡田且仍舊額無妨耕稼雖知有勸於農民復恐不均於衆望三五年中時一通括兼以州縣遭水旱處比有訴論差使封量不宜便有出剩請今後差官能敷元額已不虧官凡出剩求功請不收附所以知朝廷愛民之意照物之仁

李守瓊

守瓊漢乾祐時人官太子率更令

禁沙門著紫奏

沙門著紫比非佛門貴務奢華以邀名利諸處奏薦蓋出
顏情以臣愚見不敢便望止絕每歲誕節前據所奏薦便
令其身隨薦章詣闕令功德使召兩院僧官考試所業長
短以行恩澤庶絕濫舉之門

徐綸

綸漢乾祐時人官司法參軍

龍泉寺禪院記

欽定全唐文

卷八百五十六

李守瓊

徐綸

三

龍泉院者人天集福之所也者舊相傳其來寢遠刊刻無寄因究權輿一說云是院之東十數里孤峯之上有黃砂古祠時有一僧莫詳所自於彼祠內諷讀金剛般若經一日有白兔馴擾而來銜所傳經文蹶然而前去因從而追之至於是院之東數十步先有泉時謂之龍泉於彼祠內而僧異之而感悟焉因結茆晏坐誓於其地始建刹焉同靈驚而通幽類給孤而建號東鄰郭社之末前據金谷之垠旣名額以來標稱郭谷而斯久至有唐乾寧初西蜀惠裁精舍稟律沙門諱順懋振錫東遊浮杯遠逝偶及是院

遂欲樓心披荆榛而通過路毀薇蕨以事晨飧日往月來
以近及遠歸依者如蟻慕唱和者若蟬聯雖云興廢有時
亦繫方圓任器添棟宇於仍舊求柱石於他山紺殿故而
復新雲房卑而更起曲盡其妙以廣其居漸加少而爲多
變其質而增麗凡增修新舊屋宇並正殿等共七十餘間
其院東龍泉後面結菴之所三紀已前微認故蹟今則湮
沒矣且泉之所有時無能知者失其狀也噴湧而出喻虎
眼射人鯨口呶沫通注遽盈於溝洫奔突若駭於風雷夏
寒凝冰冬溫若沸比鏡澄澈同醴甘香不獨飲酌所須可

以塵垢旋滌矣。慙公運心匠磨智鋒，俾令堰作方塘漲，爲澄沼且嘉魚成窟。拋玉宛轉以隨人，穢觸沉波吐珠淋漓。而覆水有斯靈異甚，警凡愚自邇及遐。惟畏與敬而且植，弱柳則扶疎而春媚。蒔修篁則蒼蔚以冬青，長小松爲喬松。接山果爲家果，功旣崇矣。景旣備矣，一日慙公諭諸門人曰：「是院也，厥初住持所重幽僻，止期課誦以盡年齡。敢望崇修有若斯壯麗者矣。吾聞空寂者正真之本，名言者誘化之宗。如來亦假於莊嚴，氓俗漸歸於方便，得不申請院額增飾教門者焉？」郡牧隴西公果俞革故之謀，俾建卽

新之號因飛箋奏歲降敕文額記龍泉禪院矣時唐乾寧元年十月二十五日也

元化長壽禪院記

澤郡之西封有屬邑命之曰沁水縣沁縣之東壤有屬鄉目之曰沁水鄉是鄉也山夾長川不竭朝宗之浪路盤重阻疑遊遁世之方其土多寒其民甚樸虧周孔之文化有唐虞之古風臬紆維修蠶桑蓋寡是川之左有山之形卧虎標奇偃月挺質俗以盤屈之勢指為車輞之山相踵傳之其來遠矣至後唐天祐十九年沙門詮公俗姓楊氏遁

蹟韜光處晦藏密靈草之本根不耀真空之妙理自明杖
錫挈瓶尋幽採異因厯是山之下遂萌止足之心有近信
檀越酒稹酒寶酒暉李安共滅已有買郭武之山原勤請
住持將崇梵刹與三縣巡檢使清河張公觀瞻林麓同翫
茲山由是穿密林步纖草考以地志順彼物宜諒塵外之
寶方葺雲棲之梵刹揭怪石而平溝壑除朽壤以基垣墻
荆榛翦薙以四開鳥獸降伏而漸擾微鑿地脈遽湧寒泉
旋撥雲根用通幽徑卒成蘭若以肅住持就以山名權爲
院號自是謂之卓輞院矣詮公道惟敦實性絕浮華了知

解脫之門勇進菩提之路不求事相寧愧鄙稱一入林巒
八經寒燠至長興元年二月二十五日順化建塔於院之
右門人義常靡華法乳克荷師宗化導有方崇修益盛至
後漢乾祐三年春攝當縣長內黃扈公一日從容而謂院
主義常某慊是精藍闕以美號欲維新而改作免仍舊以
多慚舉狀申州希重建額時太守彭城公特允勤請俾光
教門以其年三月七日備僧俗禮儀螺貝鼓吹迎請碑額
懸掛大會聖凡之侶并本邑寮屬士庶以其日吉辰齋慶
訖院主以余祖構是務翰墨爲功爰託紀題以傳悠久矣

盧瓊

瓊漢隱帝時兵部員外郎

請建高祖別廟奏

恭以高祖皇帝驅除戎虜救解倒懸德被生民功高遠古
請依西漢祖宗故事於三京陝府許宋等州舊邸立別廟
塑像以時禋祀以表遺愛

王易

易周廣順元年以尚書左丞爲禮部尚書

請復尚書省令式奏

尚書省名曰中臺素稱會府列曹令式廢墜多年兩轄紀綱隳紊積歲或因貢一時之淺見破千載之通規遂俾廨宇類乎衡門官位等乎虛器若以權從改易應變弛張又未見國富時康家給民足禮記曰以舊防爲無所用而壞之者必有水敗以舊禮爲無所用而去之者必有亂患伏惟陛下守文繼統宰輔戮力致君立太平之基創無窮之業其尚書省二十四司公事望准令式積漸施行所有唐末艱難已來權立名目請皆停罷卽守官有視事之方爲吏無虛名之役

呂咸休

咸休晉天福三年禮部郎中周廣順元年以給事中爲左散騎常侍

請令閩浙貢物自出腳乘奏

臣見前朝閩浙入貢物色下船之後官差腳乘搬送到京臣悉諳知害民尤甚比來貢奉自是勤王差擾貧民貢之何益以臣管見凡此數處貢物並令自出腳乘不困貧民於理無爽

咸師範

師範周廣順元年官西頭供奉

乞宣賜物業奏

弟師朗先爲亳州蒙城鎮將因懷驚疑遁過淮外臣與東頭供奉官師睿二人時在定州監押兵士及在雍州攻城各拘職任隱帝勅書安撫臣冒死上訴緣祖父墳墓莊田點簡入官至今屬營田戶部歲時骨肉祭拜無所臣叨爲人子孝道難忘遂於生前便虧祀饗

闕下

劉暉

暉字克明晉相晌之弟後唐明宗朝累遷水部員外郎史

館修撰長興末趙鳳鎮邢臺表爲節度判官清泰初入爲起居郎累擢太府卿漢祖入立授宗正卿周初改衛尉卿廣順二年奉使高麗卒於鄆州年六十一

請慎擇牧守疏

藩侯郡牧仗鉞分符繫千里之慘舒行一方之威福自古選任須擢賢明近代統臨爲酬勲績將邦域之生聚展將領之人情識分者附正營私黷貨者嚴刑廣取諸頭剝削多贍爪牙自黃巢已來僞梁之後公署例皆隳壞編戶悉是彫殘或不近邊陲不屯師旅無城郭郡邑非控扼藩垣

試任廉能且權常理逐年屬州錢物每季申省區分支解
有餘罄竭供進府庫漸足黎庶稍蘇縱有過愆亦施懲責
言雖鄙近望賜施行

高行周

行周字尚質幽州人後唐莊宗滅梁以功領端州刺史同
光末出守絳州天成中遷潁州團練使長興初改振武軍
節度使歷鎮彰武昭義晉祖時加同平章事為西京留守
鎮天雄徙鎮歸德出帝時加兼侍中漢祖入立加守太傅
兼中書令代李守貞為天平節度使改鄴都留守加守太

尉封臨清王乾祐中加守太師進封鄴王周祖入立改封齊王廣順二年卒贈尚書令追封秦王諡武懿

辭讓詔不呼名奏

陛下每降詔書過踰常制耳聞宣讀心不遑安詔書呼名人臣常分乞不踰聖制者

趙延乂

延乂字子英泰州人世明術數仕蜀由廕爲翰林待詔後唐天成中以舊職兼衛尉少卿清泰天福中爲司天監入漢守舊職周廣順初加檢校司徒二年授太府卿判司天

監事卒年五十八贈光祿卿

嫂喪宜依令式服大功議

臣聞三代之制禮無降減之名五服之容喪有寧戚之義此蓋聖人隨時設教稱情立文沿革不同吉凶相變或服緇恩制或喪以禮加太宗文皇帝引彼至仁推其大義因覽同爨有總之義遂制嫂叔小功之服列聖尊行已爲故事傳於令式加於大功今馬縞奏論以爲錯謬況縞昔事本朝槩至梁室曾爲博士累厯歲年今始奏陳未爲允當謹按儀禮凡制五服或以名加或以尊制或推恩而有服

或引義而當喪故嫂叔大功良有以也其如叔以嫂之子爲猶子爲猶子之妻叔服大功今嫂是猶子之母安可卻服小功若以名加嫂豈疎於猶子之婦若以尊制嫂豈卑於猶子之妻論恩則有生同骨肉之情引義則有死同室兆之理若以推而遠之爲是卽令式兼無小功既有稱情制宜之文何止大功九月請依令式永作彝倫

張仁瑒

仁瑒晉天福三年大理正周廣順二年以左庶子爲大理卿

請令瘞埋刑人奏

臣常厯外任見州府刑殺罪人雖有骨肉尋時不容收瘞
皆令給喪葬行人載於城外殘害屍髮多至邀求實越葬
章頗傷仁化准獄官令諸大辟罪並官給酒食聽親故辭
訣宣告犯狀日末後乃刑注云決之經宿所司卽爲埋瘞
若有親故亦任收葬又條諸囚死無親戚者官給棺於官
地埋瘞置磚銘於壙內立牌於塚上書姓名請依令指揮
論史在德罪議

大理寺所斷卽依律文凡斷罪合取最後勅爲定詳編勅

云官典鞠獄枉濫或經臺授軌勘問不虛元推官典並當
誅罰又嘗有忻州法掾郭業故入張仁安一人死罪合當
誅罰處分今在德故入八人罪法寺不援後勅准據律文
今以郭業比附在德合處極典

賈緯

緯真定獲鹿人唐末舉進士不第後唐天成中爲石邑令
晉天福中入爲監察御史改起居郎史館修撰開運初累
遷中書舍人漢乾祐二年授左諫議大夫尋充史館修撰
判館事周祖卽位出爲平盧軍行軍司馬廣順二年卒

上唐年補遺錄奏

伏覩國史館唐高祖至代宗已有紀傳德宗至文宗亦存
實錄武宗至濟陰廢帝凡六代唯有武宗實錄一卷餘皆
缺落臣今採訪遺文及耆舊傳說編成五十五卷目爲唐
年補遺錄以備將來史官修述臣聞裴子野之修宋畧爰
在梁時姚思廉之纂陳書乃於唐世咸因喪墜是有研尋
皇帝陛下與日齊明固天縱聖華山歸馬宗文之道已行
虎殿延儒質疑之論斯啓一昨聿宣綸誥精擇史官以李
氏又終想唐年遺事雖追名上號其制相沿而創法定儀

於文或異恐謠俗之訛變致信實以湮沉將輯亡書以修
墜典臣久居職分深恥闕遺今錄淺聞別陳短序伏冀特
迴睿鑒俯念愚衷芸閣蓬山誠莫裨於良直蹄涔掬土願
少効於高深請下有司用資取證

拜給事中自訴奏

臣久塵西掖近綴東臺既居封駁之官兼處編修之職凡
關聞見合補聰明苟避事不言是上孤至聖臣聞無偏無
黨王道蕩蕩無黨無偏王道平平前書所載言之者誠千
古大君恐有毫髮之私也臣覩陛下降赦後普行恩勅武

臣之內咸協舊規文吏之中未符通論臣竊見改轉朝官自太子少保尚書丞郎內例超秩次仍峻戶封惟兩省侍從卿監之官及員外郎贊洗等依資昇進者不過數人餘並止於一階或自右入左上下都不畫一臣伏思階勲爵邑至爲重事當以德以勞次第而進雖遇慶澤不可妄加況官者代天理物國家公器雖有親昵無得輕授故曰官不必備惟其人若才稱其官當時當有顯議能不副職官便無宜濫昇以公器而爲普恩以普恩而有差等一厚一薄何疎何親臣不敢封還制書以阻成命乞陛下顯詢故

事爰下有司不次超拜者必徵殊美以第進秩者須守常規望明庭再與僉諧願陛下曲畱省察兼有前朝并爲執政見排左授官秩者及在官無累或丁憂已滿未蒙叙遷各許進狀以自申明或顯見於章疏幸特頒於制命或期效用不致沉埋則免使得路者自伐自矜結恩私室失意者愈嗟愈歎流怨公朝光陛下聖明之規表陛下均平之德將恢至理以致太和

昭義軍節度使安元信諡議

叨居禮職式考儒經德雖以百行相成諡乃取一善爲定

公經邦緯俗積行累功宜立總名用彰殊號按諡法事君盡節曰忠體和居中曰懿左傳曰公家之事知無不爲忠也春秋正義曰保已精粹立行純厚懿也公抑揚事任周旋盛明嘗險阻艱難秉溫良恭儉或宣風千里有負襁之民或布政百城致隨軒之雨道光羣后功著厯朝凡士大夫歎開幕之芙蕖久謝無賢不肖感成蹊之桃李空存煥彼緹緇豐諸碑版令被實錄非讓古人事君既有忠規爲臣足以御衆復彰懿行從政備焉前代所高斯諡爲當請諡曰忠懿

李元懿

元懿周廣順二年官北海令

上六事疏

臣爲北海令時夏秋苗上每畝麻農具等錢省司元定錢
十六及劉銖到任每畝上加四十五每頃配柴五圍炭三
秤省條之外嚴刑立使限徵臣竊聞諸道亦有如劉銖配
處望令禁止

臣在任時奉劉銖文字放絲三萬兩配織絹五千匹管內
七縣大抵如是及徵收在賦稅之前督責抑凌借役戶民

多造店宅碾磴典庫請朝廷指揮許人論告差軍人百姓五工已上出放物至匹斤以坐贓論自然止絕斯弊

臣在任時見劉銖擅棄國章便行決配凡罪人或刺面填都或決配沙門島大凡配流加役是朝廷格律今後更請以不道論

臣見諸處商稅有越常規乃至草木蟲魚無不取稅更有歲定稅率卽令兒姪僉從主張便行枷棒作事非法有紊國章今後請三司差人主持止絕斯弊

臣伏見晉朝曾配百姓食鹽錢每頃配鹽二十斤納錢五

十五數足然後許百姓私買煎造自後鹽鐵使指以贍軍
爲名禁斷鹽法苗畝所配不放納錢稅物重徵生靈不易
今逢理代宜有改更使人口淡食者多其主糶職員又入
沙石硝鹵大半今後如國家立法糶鹽乞放卻苗上率配
稍撫蒸民以安國本

臣見麴法一條最未中理多與州縣民歲定課利至於酤
酢賣糟爲弊尤甚臣請州府榷酒戶鄉村不禁許令私造
依明宗朝所行稅戶每畝納麴錢三則酒酢之流民得便
用

石公霸

公霸周廣順三年官隴州防禦使

本管縣鎮越訢鳳翔奏

元管三縣五鎮自秦州阻隔廢定戎新關兩鎮唯汧源皆稱直屬本府及官吏批書厯子考較課最賊盜寇攘戶民減損又貴州司職分何以檢校昨汧陽令李玉上府主簿林萼下鄉州司不曾指揮本縣亦無申報每有提舉皆稱本府追呼無以指縱何能致理其間戶口多有逃亡預虞大比之時恐速小臣之罪伏覩近勅凡有訴訟尚委逐處

區分不得驀越豈可本屬縣鎮每事直詣鳳翔望降新規以滌舊弊

馬裔孫

裔孫字慶先棣州商河人少舉進士爲後唐潞王河中觀察支使清泰初累拜中書侍郎同中書門下平章事晉祖入立罷歸田里周祖卽位就加檢校禮部尚書太子賓客分司洛陽廣順三年卒贈太子少傅

免史在德言事罪詔

左補闕劉濤等奏太常丞史在德所上章疏中書門下駁

奏未奉宣諭乞將施行分明黜陟朕嘗覽貞觀故事見太宗之理以貞觀升平之運太宗明聖之君野無遺才朝無闕政盡善盡美無得而名而陝縣丞皇甫德參輒上封章恣行訕謗人臣無禮罪不容誅賴文貞彌縫恕德參之狂瞽徵奏太宗曰陛下思聞得失只可恣其所陳若所言不中亦何損於國家朕每思之誠要言也遂得下情上達德盛業隆太宗之道彌光文貞之節斯著朕惟寡昧獲奉宗祧業業兢兢懼不克荷思欲率循古道採拔時材懷忠抱直之人虛心渴見便佞詭隨之說杜耳惡聞史在德近所

貢陳誠無避忌中書以文字紕繆比類僭差改易人名觸犯廟諱請歸憲法以示戒懲蓋以中書既委參詳合盡事理朕纘承前緒誘勸將來多言數窮惟聖祖之所戒千慮一得冀愚者之可從因覽文貞之言遂寬在德之罪爰令停寢不遣宣行劉濤等官列諫垣宜陳讜議請定短長之理以行黜陟之文昔魏徵則請賞德參今濤等請黜在德事同言異何相遠哉將議允俞恐虧開納方今朝廷粗理俊乂畢臻畱一在德不足爲多去一在德不足爲少苟可懲勸朕何愛焉但緣情在傾輸理難黜責濤等敷奏朕亦

優容宜體含洪勉思竭盡凡百在位悉聽朕言

盧損

損范陽人梁開平初進士貞明中累官至右司員外郎後唐天成初由兵部郎中擢史館修撰轉諫議大夫清泰初爲御史中丞晉天福中遷右散騎常侍轉祕書監授戶部尚書致仕周廣順三年卒年八十餘贈太子少傅

酌定不便時宜條件奏

臣等先編聯制勅外有比非故實不便於時條件准天成元年七月及四年十一月勅應中外官除授不許品秩一

例宣賜告身請依舊制合賜外各令自出綾紙又天成元年八月勅除授旨授令錄皆令內殿辭謝臣等以令錄卑微不可內廷展謝請依舊制正衙辭謝又天成三年五月長興二年七月勅許節度使帶使相歲薦五人餘薦三人防禦團練使二人臣惟州縣員缺甚少若容薦舉則每年銓選何以注擬請特行釐革又長興二年八月勅州縣簿尉判司差充軍判官仍同一任自爾以來頗傷物論以爲不當請行止絕依舊令衙前選任

請停春關宴奏

天成二年二月勅每年進士合有聞喜宴春闕宴牒用綾紙並官給臣等以舉人既成名第宴席所費屬私況國用未充枉有勞費請依舊制不賜

陳五事疏

臣親陛下勤儉爲本宵旰是專日新之德繼聲時病之憂漸息事纔達聽言乃必行若有隱於聖明必貽咎於陰責器小而誠難測海日下而但合傾心今欲曉諭中外臣寮戴星登車端門待漏寅初開鑰日出排班中興殿庶事未通乞光降宣不坐冀視朝之制合古事君之禮得中匪懈

之誠咸專未明之求外顯

臣聞食其時則百骸皆理失其言而駟馬難追利便可行疎闊莫返況開闔之制出入須常且貴賤而不分恃強壯而爭進此後逐日早辰軍人百姓馬羣放牧令兩掖門出廣列尊卑

帝居皇宅法象大微取則皆自於上元隳度無違於古道標正影端之語萬世不踰從權就便之規一時難守臣見九衢巷陌已是漸微兆庶街坊未止侵占陛下仁恕在念約絕難行且乞五鳳樓南定鼎門北禁止搭棚離圍籠樹

舍簷取土填街引渠穢路請指揮金吾軍巡止絕

橋號天津名實帝道人臣履歷尚合兢趨牛車往來公然縱恣請止絕天津橋中道兩頭下關駕出卽開兩傍之路士庶往來其車牛並浮橋路來往

朝廷所重名器爲先敘禮樂道尊卑明貴賤伏見禁門之內人馬出入極多臣請凡官員除將被袋馬外其餘騎從並令於光政門外下馬

許遷

遷鄆州人初爲本州牙將漢乾祐初爲左屯衛將軍改左

監門衛大將軍加檢校司空漢未權知隰州周祖卽位正授隰州刺史罷奉朝請卒

破河東賊奏

河東賊軍侵我今月十一日遣步軍都指揮使孫繼業等領兵三百至州北長壽寺掩殺獲賊砦將程筠軍使冒干王仁原供奉官李演竝駝馬等所獲賊將較竝斬之不數日賊引軍攻城四面齊進臣與判官李昉都指揮使趙太糧料使王光裔官員職掌百姓守把拒鬪焚賊攻具死者五百餘傷者千餘信宿遁去

欽定全唐文卷八百五十七目錄

張穎

形鹽賦

王殷

辭奪情疏

劉言

收復湖湘表

收復湖湘狀

馮道

上唐明宗徽號冊

請以聖壽日爲啓聖節表

請上尊號表

請上尊號表

請徽號內加廣道法天四字表

請依舊置樞密使表

請以聖壽日爲天和節表

請正朝班奏

論安不忘危狀

長樂老自叙

移文宣王廟記

欽定全唐文卷八百五十七

張穎

穎太原人駙馬都尉永德之父累爲藩郡列校由內職歷諸衛將軍晉祖時爲壽王重又莊宅使周廣順初自華州行軍司馬歷郢懷二州刺史遷安州防禦使爲部曲所殺

形鹽賦

以入用調鼎和羹爲韻

形鹽似虎岐峙山立虎則百獸最威鹽乃萬人取給合二美以成體何衆羞之能及厥貢惟錯將蛤蜊以俱來充君之庖與昌歆而齊入麗哉其義可嘉其美可頌魯崇宴賞

周公實來殷作和羹傳說登用向若美景初霽奇狀不遙映金盤以皎皦臨象筓而光昭遠則雪山出地近則白虎戲朝瞿瞿其肉威而且猱眈眈其目視而不忮立而成形也白黑相對融而司味也鹹酸必調厥味伊何物不可並水火相濟爲君子以成八珍上下協諧具公餽而登五鼎利我者則衆成我者幾何備物象形卽賤不干貴皆可適口豈同而不和至如大君式宴罇俎充盈形鹽具矣以爲賓榮意者取則國君文足昭德武以弭兵時之所貴物莫能京故天官敘其職春秋美其名必也見遺則陸沉於懷

土如或可用當濟代之和羹儻有裨於家國在吾道之應行

王殷

殷瀛州人後唐同光末爲華州馬步軍副使天成中移授靈武都指揮使清泰中授邠州刺史晉天福中改憲州刺史少帝嗣位累遷奉國右廂都指揮使漢乾祐末領夔州節度使周太祖卽位授天雄軍節度使加同平章事後被誅

辭奪情疏

臣爲未將出處無損益於國家臣本燕人值鄉國離亂少
罹偏罰因母鞠養訓導方得成人不忍遽釋苴麻遠離廬
墓伏願許臣終母喪紀

劉言

言廬陵人仕楚文昭王馬希範爲辰州刺史恭孝王希萼
立權武平畱後徐威之亂言遂盡取湖南故地奉表於周
除武平節度使同平章事後爲靜江指揮使王逵所殺

收復湖湘表

臣聞域中至大須歸正統之君海內稱尊合奉眞明之主

事既緣其道阻機且務於從權關河之信使不通戎鎮之
牋章未達實爲睽越罪屬稽留臣前年以馬氏弟兄交相
魚肉是希崇之失禦致邊鎬之侵疆當道節度使馬光惠
早副羣情方施庶政遽多耽惑將亂紀綱三軍商量乃行
廢黜臣謬居上將忽被衆推尋且奉表東吳所冀且安西
土不謂湖南節度使邊鎬多行間謀嘗畜陰謀致半年未
降於新恩而中使遽來於急詔而又縱橫肆意說誘五溪
暗行文書廣齎金帛將謀會合欲舉攻狀臣請節度副使
王進逵行軍司馬何敬真別差指揮使周行逢朱全琇張

倣等慮其姦計恐致危亡乃舉兵師去平凶寇自十月三日水陸發兵順水至五日收下沅江九日又下益陽十四日克復湖南越池邊鎬見其危迫陸路奔逃見發奇兵掩後追逐料行狼狽必恐收擒臣素昧兵鈴曾無將畧幸處軍中之長叨司閫外之權念臣節以徒堅望堯階而尚賈既復瀟湘之土宇永依日月之照臨幸成破竹之功敢慢傾葵之懇且馳單介徑達皇都謹差節度押牙張崇嗣奉表以聞

收復湖湘狀

當道去年以湖南馬希萼弟兄傷蹇家國陵夷淮南差邊
鎬潛入長沙便爲據守扶風一族楚水萬家並押送東吳
固無畱者當道有兵士二千來衆亦被括將累乞放迴意
未允許今春前節度使馬光惠耽荒稍甚僭侈非常三軍
商量乃行廢黜臣以位居遣貳衆意推崇辭讓旣難藩方
無主此際以馬光惠早歸東國累降頒宣臣等例奉甄昇
未遑迴變方思迷職隣道可明不謂湖南頻行間鬪彼衆
將行討伐當軍須舉兵師冀先定於熊湘復歸明於象闕
東吳早以臣權知戎閫未降明恩尋有急徵並令歸國其

邊鎬唯懷詭詐多蓄姦謀況五溪八州是武陵管屬邊鎬
暗齎金帛密與鈎連計料加兵欲謀攻逼於界首益陽縣
下砦聚食屯師自謂士卒精強壕塹牢固當道節度副使
王進遠行軍司馬何敬真指揮使周行逢朱全瑋蒲公益
等去十月三日部署大齊雲截波魚龍戰棹等三百餘艘
計三萬人並陸路指揮使張傲董從德等押馬步兵士二
萬餘人同日進發五日收下沅江縣獲賊都監劉承遇其
賊將李師德等五百餘人並束甲歸降至九日到益陽寨
賊衆一萬餘人堅守抵扞攻擊自辰至未其砦自潰殺戮

八千餘人捉得都指揮使夏昌活擒八百餘人至十一日
橋口湘陰數處相次歸降至十三日當軍水陸俱上經長
沙城下邊鎬見其兵勢不敢拒張當夜取東路奔逃至十
四日進遠敬真差發五千餘人追襲除鎬先次奔竄外掩
殺賊衆五百餘人卽日進遠敬真入湖南城安撫軍民訖
其東吳岳州刺史宋德權尚倚孤壘亦聚強兵探知搬下
舟船亦無鬪志十月十八日差指揮使蒲公益押戰船五
十隻兵士三千人到岳州城下其宋德權卽時焚城而竄
便令蒲公益權主岳州招撫生衆其潭州上江諸郡邑見

金史卷之三十一
差守宰撫安

馮道

道字可道瀛州景城人天祐中事劉守光爲幽州掾歷晉王從事後唐同光中充翰林學士遷中書舍人戶部侍郎明宗入洛累拜中書侍郎同中書門下平章事封始平郡公末帝嗣位出爲同州節度使拜司空晉滅唐又事晉守司空同中書門下平章事加司徒兼侍中進魯國公少帝朝加太尉進燕國公罷爲匡國節度使徙鎮威勝契丹滅晉又事契丹爲太傅漢祖立又歸漢以太師奉朝請周滅

漢又事周廣順初拜太師中書令顯德元年卒年七十三
贈尚書令追封瀛王諡文懿

上唐明宗徽號冊

維長興元年歲次庚寅四月甲午朔二十五日戊午金紫
光祿大夫守尚書左僕射兼門下侍郎同中書門下平章
事充太微宮使宏文館大學士上柱國始平郡開國侯食
邑一千五百戶食實封一百戶臣馮道銀青光祿大夫門
下侍郎兼吏部尚書同中書門下平章事監修國史判集
賢院事上柱國天水郡開國伯食邑七百戶臣趙鳳及文

武百官特進太子少傅上柱國酒泉郡開國侯食邑一千
戶臣李琪等五千八百九十七人言臣聞天不稱高而體
尊地不矜厚而形大厚無不載高無不覆四時行乎內萬
物生其間總神祇之靈叶帝王之運日出而星辰自戢龍
飛而雷雨皆行元氣和而天下和庶事正而天下正伏惟
皇帝陛下天授一德時歷多艱翊太祖以興邦佐先皇而
定難拯嗣昭於潞困救德威於燕危遏思遠而全鄴都誅
彥章而下梁苑成再造之業由四征之功洎纂鴻圖每敷
皇化去內庫而省庖膳出宮人而減伶官輕寶玉之珍卻

鷹鷂之貢淳風旣洽嘉瑞自臻故登極之前人皆不足改
元之後時便有年遐荒旋斃於戎王重譯往來於蠻子東
巡而守殷殪北討而王都殲破契丹而燕趙無虞控靈武
而瓜沙並復近以饗上元而薦太廟就吉土而配昊天輅
已降而雨露事欲行而月見燭柴禮畢作解恩覃帝命咸
均人情普悅非陛下有道有德至聖至明動不疑人靜惟
恭已常敦孝禮每納忠言則何以臨御五年澄清四海時
久纏於災害民驟見於和平休徵備載於簡編徽號過持
於謙讓三年不允衆志皆堅天不以上帝自崇日不以大

明自貴於蒸民有惠於元后同符列聖皆然舊章斯在今
以明庭百辟列土諸侯中外同辭再三瀝懇臣等不勝大
願謹奉玉寶玉冊上號曰聖明神武文德孝恭皇帝伏惟
皇帝陛下體堯舜之至道法日月於太虛威於夷狄恩及
蟲魚奉國者繼加榮寵違天者咸就誅鋤典禮當告成之
後夙夜思卽位之初千秋萬歲永混車書

請以聖壽日爲啓聖節表

臣等聞大電繞樞哲后繼犧農之運五星聚井真人啓文
景之基昌圖允洽於千年嘉號宜光於載誕不有稱述曷

顯休明伏惟皇帝陛下玉律調元金華啓旦上帝錫九齡
之夢道人聞下武之詩德協無爲民知有慶當大雨時行
之日乃常星不見之辰將歡寓縣之心竊效華封之祝臣
等不勝大願望以六月二十七日爲啓聖節著於甲令告
彼萬方使地角天涯望南山而祝壽九州四海仰北極以
傾心誠垂致主之功輒敢稱君之美

請上尊號表

先以中外同詞華夷叶慶敬尊往制特上徽名天睠未回
王言疊降過持謙柄尚拘羣情將永顯於洪休須再陳於

丹素伏惟皇帝陛下中興續祀下武應期務華去實還淳
返朴有聞善必行之聖有無幽不燭之明以神武戡定四
方以文德懷柔八極惟恭與孝繼祖承祧臣等考尋帝載
奉揚休烈請上尊號曰聖明文武恭孝皇帝約就望而臆
譚堯德敘聲身而首贊禹謨此際陛下以郊禋未展於泰
壇帝饗未修於清廟易水之殘妖未殄江陵之闔境未寧
堅違丹赤之誠更待和平之日今則乾坤大定書軌混同
北暨幽陵南窮丹徼東踰滄海西越流沙率梯航者願布
腹心俟于羽者已陶聲教園丘報本顯陳燔燎之儀宗祏

告虔親奉雲韶之薦而況萬邦胥悅百穀順成天垂上瑞
之文人樂絲庚之化雞竿作解鳳紀維新野喧擊壤之歌
兵入藥弓之詠人祇祈合日月重光明哉康哉美矣盛矣
臣等生逢景運仰鑽丕圖是將億兆之心虔貢再三之請
冀茂實永光於圖史徽猷式冠於古今上契天心下從人
欲凡厥臣庶恭俟允俞

請上尊號表

粵以惟帝奉天惟臣奉主就陽展禮一人虔報本之心揆
德宏猷萬國切歸尊之願載揚明號思稱洪休瞻旒冕以

獻言望昊穹而垂允臣等頓首臣聞德所以誕敷四海名所以馳裕萬邦苟黼藻之頌不傳則就望之容何著故質文迭用賓實相符禮有常尊臣子合遵於舊典功無與讓君親當協於至公伏惟皇帝陛下清明在躬純德受命宏要道於天下暢貞風於域中通達無方淵源不測此所謂聖以合道也外宣百度上法三光銅渾昭乾健之規玉燭朗陽舒之景無幽不燭有感皆通此所謂明以燭遠也至如用姬公之典以御十倫敬孔子之祠以興四教觀書乙夜徇鐸孟春遠服殊隣王道無偏而蕩蕩親平叛壘天網

不漏而恢恢虜帳以是銷魂并土以之脅息此所謂文以興教武以宅功也又若煦嫗萬物昭蘇九圍協天載以無聲恢帝猷而有截涵如東海固比南山此所謂仁以阜成德以順正者也皇帝陛下聖廣造化明均照臨同文班黼黻之章常武蓄雷霆之勢仁兼孝以並率德與道而相權總集衆方光揚茂實臣等不勝大願謹上尊號曰聖明文武仁德皇帝恭惟雍熙之代開泰之朝君臣崇相正之規天地無不交之象書曰一人有慶當皇極之盛隆詩曰萬國作孚在鴻名之遠逮臣等幸逢景運獲事朝廷表端位

而列羣司各承豐澤章至尊而舒盛德敢忘前規慙懇傾
輸望恩俞允

請徽號內加廣道法天四字表

臣等聞乾文上布嘗居莫大之尊坤體下凝克闡無疆之
道以是發生悠久亭育運行人識元功遂配高明之號世
詳陰德爰標博厚之名皆彰得一之靈盡合通三之義帝
王繼統古今同符皇風愈至於治平羣願並虔於將順伏
惟聖明神武文德恭孝皇帝陛下乾坤正氣日月並明千
年廣出震之期萬乘發承祧之日寬仁大度映惇史於前

王儉德淳風契徽猷於太古而自削平多難纂紹洪基視
兆庶以如傷致八紘之丕變蠻夷率服稼穡豐登普天揚
溢美之聲當寧固持謙之旨夙堅衆志久抑鴻名洎展禮
祖宗告虔天地乃從人而降命獲奉冊以陳誠紀述聖謨
但務屬詞之實申明邦典方諧得理之宜郊祀以來日新
其化四年益理九土咸寧惡黨挺妖伏天威而悉殄遠藩
効順感帝德以皆來塞外休兵域中無事保深根而固蒂
延地久以天長臣等輒據羣情虔徵故事合增加於徽號
免漏畧於宸猷伏以道爲廣大之宗天布生成之惠仰惟

一德宜總二名臣等伏請於尊號內加廣道法天四字庶得彰明典禮若傾翊戴之心輝煥簡編永表雍熙之運

請依舊置樞密使表

竊以樞密使創自前朝置諸近侍其來已久所便尤多頃歲樞密使劉處讓偶屬家艱爰拘喪制旣從罷免暫議改更不曾顯降勅文永停使額所願各歸職分豈敢苟避繁難伏請依舊置樞密使

請以聖壽日爲天和節奏

臣聞惟睿作聖千年乃契於貞期大德曰生萬國咸思於

令節將詮懿號仰慶休辰傾心未出於常名近意有塵於
嘉會伏惟皇帝陛下應天順人握圖御寓拯寰瀛於否極
俾動植以泰來允符鳴社之祥方顯繞樞之瑞而況斗柄
正卯律吹仲春當帝王出震之方是天地同和之月斯辰
誕聖衆靈咸歸顧前代而罕同在舊章而宜舉垂諸不朽
簡編既溢於徽猷必也正名稱謂須符於景貺伏願以來
年二月二十八日爲天和節庶夫觴稱萬壽稍申將順之
心節配四時永洽好生之德

請正朝班奏

宰臣朝見辭謝在朝堂橫街之南逮至餘官則悉於崇元門內夫表著之列豈可踰之故古先明王必正其位服此實事因偶爾習以爲常又入閣禮畢之時羣官退於門外定班如初俟宣放仗唯翰林學士前任郡守等不隨百辟卽時直出二者禮僭序失其使正之

論安不忘危狀

臣爲河東掌書記時奉使中山過井陘之險懼馬蹶失不敢怠於御轡及至平地謂無足慮遽跌而傷凡蹈危者慮深而獲全居安者患生於所忽此人情之常也

長樂老自敘

余世家宗族本始平長樂二郡歷代之名實具載國史家牒余先自燕亡歸晉事莊宗明宗閔帝清泰帝又事晉高祖皇帝少帝契丹據汴京爲戎二主所制自鎮州與文武臣僚馬步將士歸漢朝事高祖皇帝今上顧以久叨祿位備厯難危上顯祖宗下光親戚亡曾祖諱湊累贈至太傅亡曾祖母崔氏追封梁國太夫人亡祖諱景累贈至太師亡祖母褚氏追封吳國太夫人亡父諱良建祕書少監致仕累贈至尚書令亡母張氏追封魏國太夫人余階自將

仕郎轉朝議郎朝散大夫朝議大夫銀青光祿大夫金紫
光祿大夫特進開府儀同三司職自幽州節度巡官河東
節度巡官掌書記再爲翰林學士改授端明殿學士集賢
殿大學士太微宮使再爲宏文館大學士又充諸道鹽鐵
轉運使南郊大禮使明宗皇帝晉高祖皇帝山陵使再授
定國軍節度同州管内觀察處置等使一爲長春宮使又
授武勝軍節度使鄧隨均房等州管内觀察處置等使官
自攝幽府參軍試大理評事檢校尚書祠部郎中兼侍御
史檢校吏部郎中兼御史中丞檢校太尉同中書門下平

章事檢校太師兼侍中又授檢校太師兼中書令正官自
行臺中書舍人再爲戶部侍郎轉兵部侍郎中書侍郎再
爲門下侍郎刑戶吏尚書右僕射左僕射三爲司空兩在
中書一守本官又授司徒兼侍中賜私門十六戟又授太
尉兼侍中又授戎太傅又授漢太師爵自開國男至開國
公魯國公再封秦國公梁國公燕國公齊國公食邑自三
百戶至一萬一千戶食實封自一百戶至一千八百戶勲
自柱國至上柱國功臣名自經邦致理功臣至守正崇德
保邦致理功臣安時處順守義崇靜功臣崇仁保德寧邦

翊聖功臣先娶故德州戶掾褚諱瀆女早亡後娶故景州
弓高縣孫明府諱師禮女累封蜀國夫人亡長子平自祕
書郎授右拾遺工部度支員外郎次子吉自祕書省校書
郎膳部金部職方員外郎屯田郎中第三亡子可自祕書
省正字授殿中丞工部戶部員外郎第四子幼亡第五子
義自祕書郎改授銀青光祿大夫檢校國子祭酒兼御史
中丞充定國軍衙內都指揮使職罷改授朝散大夫右春
坊太子司議郎授太常丞第六子正自協律郎改授銀青
光祿大夫檢校國子祭酒兼御史中丞充定國軍節度使

職罷改授朝散大夫太僕丞長女適故兵部崔侍郎諱衍
子太僕少卿名絢封萬年縣君三女子早亡二孫幼亡唐
長興二年勅瀛州景城縣莊來蘇鄉改爲元輔鄉朝漢里
改爲孝行里雒南莊貫河南府雒陽縣三川鄉靈臺里奉
晉天福五年勅三川鄉改爲上相鄉靈臺里改爲中臺里
時守司徒兼侍中又奉八年勅上相鄉改爲太尉鄉中臺
里改爲侍中里時守太尉兼侍中靜思本末慶及存亡蓋
自國恩盡從家法承訓誨之旨關教化之源在孝於家忠
於國口無不道之言門無不義之貨所願者下不欺於地

金志卷之二十一
中不欺於人不欺於天以三不欺爲素賤如是貴如是
長如是老如是事親事君事長臨人之道曠蒙天恕累經
難而獲多福曾陷蕃而歸中華非人之謀是天之祐六合
之內有幸者百歲之後有歸所無以珠玉含當以時服斂
以籩簠葬及擇不食之地而葬焉以不及於古人故祭以
特羊戒殺生也當以不害命之物祭無立神道碑以三代
墳前不獲立碑故無請諡號以無德故又念自賓佐至王
佐及領藩鎮時或有微益於國之事節皆形於公籍所著
文章篇詠因多事散失外收拾得者編於家集其間見其

忘知之者罪之者未知衆寡矣有莊有宅有羣書有二子
可以襲其業於此日五鹽日三省尚猶日知其所亡月無
忘其所能爲子爲弟爲人臣爲師長爲夫爲父有子有猶
子有孫奉身卽有餘矣爲時乃不足不足者何不能爲大
君致一統定八方誠有愧於厯職厯官何以答乾坤之施
時開一卷時飲一盃食味別聲被色老安於當代耶老而
自樂何樂如之時乾祐三年朱明月長樂老序云

移文宣王廟記

清泰中道初領鎮之時徧謁廟之際再拜宣聖久立荒祠

後臨街而地位窮前逼城而日光少羊觸藩而來者衆豕
負途而去者多雨信納汙風知逐臭顧以濫爲子弟忝作
公侯得富貴而因詩書擁旌旄而輕俎豆何以爲漢相何
以見魯人遂申如在之誠別卜維新之所乃移於通衢之
北在馮翊縣之西龜筮相從官吏相合不煩隧正不擾里
胥不妨農不害物畚鍤者楨幹者斧斤者藻繪者一無闕
垣墉棟宇榱桷階序門屏一無闕自山龍已降至絺繡一
無闕河目海口堯頭舜項之像亦依然其文也布在四方
其教也傳於萬代依其教者順而正違其教者逆而邪德

與天地齊明與日月等昔賢云自生民以來未有如夫子者也非此心此口而可稱讚時以拙於爲政昧於立功民未蘇而責躬廟纔成而赴闕別離七縣倏忽十年今又此來固非所望手持龍節顯奉新恩目覩象環虔瞻舊制於漆沮之地有洙泗之風念伯魚之學詩可知家法想祖龍之焚處自墜皇圖今逢下武之時無失上丁之節公卿沕穆侯伯皆忠將戢干戈永安宗社文武之道邦家之基共分宵旰之憂同保車書之運老夫之幸明神所知謹以崇儒移廟之懇紀於公門南之左時開運三年正月十五日

記